

四庫全書

史部

欽定四庫全書

欽定重訂契丹國志卷二

太宗孝武惠文皇帝上

太宗皇帝諱德光太祖第二子也母曰舒嚕氏帝誕于大部落東一千里之牙帳生時黑雲覆帳火光照耀有聲如雷及長美姿貌雄傑有大志精于騎射平奚渤海二國太祖愛之立為元帥太子嘗從太祖至西樓有赤光紫氣蓋其上左右異之舒嚕后尤所鍾愛太祖崩於

扶餘后欲立之至西樓命帝與托雲

太祖長子

俱乘馬立帳

前謂諸臣曰二子吾皆愛之莫知所立汝曹擇可者執其轡羣臣知后意爭執帝轡后曰衆之所欲吾安敢違遂立為皇帝托雲愠欲奔于唐后乃遣歸東丹帝立尊后為應天皇后國事皆決焉太后復納其姪為皇后帝性孝謹太后病不食亦不食嘗侍于太后前應對或不稱旨太后揚眉而視之輒懼而趨避非復召不敢近也

丁亥天顯二年春正月唐主李嗣源更名亶 秋八月朔

日食 遣使如唐修好 九月葬太祖於木葉山置州

陵側名曰祖州今有廟其靴尚在長四五尺

案原書葬太祖下有

舒嚕后欲殺趙思溫事與舒嚕后傳兩見今刪去以省繁複

冬十一月帝即位有

司請改元不許

案遼史天顯元年七月太祖崩舒嚕后稱制二年九月葬太祖十一月太宗即

位蓋太祖本立托雲為太子舒嚕后廢長立少其初蓋亦頗難之故遷久而太宗始立也原書誤書太祖之葬

于元年之八月又誤書太宗之立于太祖葬之月今並改正

戊子天顯三年春二月朔日食 夏四月唐義武節度使

王都在鎮州謀反唐主遣招討使王晏球等發諸道兵會討定州晏球攻拔其北關城王都以重賂求救于托諾五月托諾以萬騎入定州晏球退保曲陽王都與托諾就攻之與晏球戰不利帝益大發兵救定州王都悉衆與我兵五千騎合萬餘人邀戰晏球集諸將校誓以報國悉去弓矢以短兵來擊回顧者斬於是精騎先進奮槌揮劍直衝我陣我兵大敗僵尸蔽野死者過半餘走王都與托諾得數騎僅免我兵敗還者又為唐盧龍

節度使趙德鈞邀擊殆無孑遺 秋七月帝復遣特哩
袞等救定州為王晏球逆戰所破追至易州死者不可
勝數趙德鈞遣牙將武從諫邀擊特哩袞等數百人被
擒餘衆散投村落人以白梃擊之其得脫者不過數十
人帝以出師非時甚悔之厚賜戰歿將校之家 八月
遣使如唐

且已天顯四年春二月唐王晏球克定州王都托諾欲突
走被圍不能出定州都指揮使馬讓能開門納唐軍王

都舉族自焚托諾被擒死之

案托諾力戰被擒而死實為忠於所事原書作斬之

乃沿通鑑原文敵國之辭不可為訓今從遼史本紀改書死之以符史法

庚寅天顯五年

後唐明宗長興元年

夏六月朔日食 冬十一月

人皇王托雲失職怨望帥其部曲四千人越海奔唐唐

賜姓東丹名慕華

明年改賜姓李名贊華

以為懷遠節度使

辛卯天顯六年冬十一月朔日食

壬辰天顯七年春三月遣使如唐請歸擒去庫色勒徹爾

與特哩袞唐乃遣庫色勒與我使者俱歸而留徹爾不

遣帝怒因數遣兵攻雲州及振武 冬十一月唐以石

敬瑭

敬瑭娶明宗女永寧公主

為河東節度使蔚州刺史張彥超與

敬瑭有隙聞其為節度使遂來降

癸巳天顯八年冬十一月唐明宗殂年六十七明宗性不

猜忌與物無競登極以來每夕于宮中焚香祝天曰某

因亂為衆所推願天早生聖人為生民主在位年穀屢

豐兵革罕用較之五代粗為小康 十二月唐主從厚

立葬明宗于河南洛陽縣

甲午天顯九年

後唐愍帝從厚應順元年四月以後後唐主從珂清泰元年

春正月唐

潞王從珂叛至長安唐遣康義誠為招討使將兵拒之

潞王所至唐諸將及康義誠等皆降唐愍帝憂駭不知

所為領五十騎自隨出奔至衛州東數里遇石敬瑭問

以大計敬瑭聞康義誠等叛降俛首長歎未幾敬瑭命

牙內指揮使劉知遠引兵盡殺愍帝從兵獨置愍帝於

驛遂趣洛陽夏四月唐潞王從珂入洛陽至蔣橋馮

道率百官班迎傳教以未拜梓宮未可相見入謁太后太

妃詣西宮伏梓宮慟哭自陳詣闕之由馮道帥百官班見拜潞王答拜道等上牋勸進潞王曰予之此行事非獲已俟皇帝歸闕園寢禮終當還守藩服明日太后下令廢唐主為鄂王以潞王知軍國事又明日太后令潞王即位于柩前遣王宏贄遷愍帝于衛州廨內隨遣宏贄之子王巖往酖之愍帝不飲巖繼殺之愍帝之在衛州惟磁州刺史宋令詢遣使問起居聞其遇害慟哭半日自經死冬十一月唐葬鄂王於徽陵域內南

徽陵明宗墓也

封纔數尺觀者悲之

乙未天顯十年夏六月帝屢遣兵攻唐之北境時石敬瑭將大兵屯忻州潞王遣使賜軍士夏衣傳詔撫諭軍士呼萬歲者數四敬瑭懼幕僚段希堯請誅其倡者敬瑭命劉知遠斬三十六人以徇潞王聞益疑之

丙中
天顯十一年

十一月以後晉高祖敬瑭天福元年

夏五月唐以石敬瑭

為天平節度使敬瑭拒命謀叛唐主發兵討之 秋七

月唐殺石敬瑭子第四人敬瑭令掌書記桑維翰草表

來稱臣且請以父禮事帝約事捷之日割盧龍一道及
雁門關以北諸州為獻表至帝大喜復書許俟仲秋赴
援 九月帝將兵五萬騎自揚武谷而南至晉陽陳於
汾北之虎北口先遣人謂石敬瑭曰吾欲今日即戰可
乎敬瑭遣人馳告曰南軍甚厚請俟明日使者未至我
兵已與唐騎將高行周符彥卿合戰敬瑭遣劉知遠將
兵來助唐張敬達楊光遠安審琦以步兵陳于城西北
山下帝遣輕騎三千不被甲直犯其陳唐兵逐之至汾西

為伏兵所衝唐兵斷而為二因縱兵乘之唐兵大敗死者近萬人敬達等收餘衆保晉安帝亦引兵歸虎北口敬瑭得唐降兵三千餘人劉知遠勸敬瑭盡殺之是夕敬瑭出見帝問曰皇帝遠來士馬疲倦遽與唐戰而大勝何也帝曰始吾謂唐必斷雁門諸路伏兵險要不可得進使人偵視皆無之是以長驅而深入我氣方銳乘此擊之是以勝也敬瑭歎伏引兵會圍晉安寨置營于晉安之南長百餘里厚五十里多設鈴索吠犬人跣

步不能過敬達等士卒猶五萬人馬萬匹四顧無所之
遣使告敗唐潞王大懼下詔親征潞王至懷州以晉安
為憂問策于羣臣吏部侍郎龍敏請立李贊華為契丹
主令天雄盧龍二鎮分兵送之自幽州趣西樓朝廷露
檄言之契丹必有內顧之憂然後選募精銳以擊之此
亦解圍之一策也潞王深以為然而執政恐其無成議
竟不決潞王憂沮日夕酣飲悲歌羣臣或勸其北行則
曰卿勿言石郎使我心膽墮地冬十月唐詔大括天

下將吏及民間馬又發民為兵每七戶出征夫一人自備鎧仗謂之義軍凡得馬二千餘匹征夫五千人民大擾十一月帝謂石敬瑭曰吾三千里來赴難必有成功觀汝器貌識量真中原之主吾欲立汝為天子敬瑭辭讓數四將吏勸進乃許之帝作策書命敬瑭為大晉皇帝自解衣冠授之築壇即位晉割幽薊瀛莫涿檀順新媯儒武雲應寰朔蔚十六州以獻仍許歲輸帛三十萬匹改長興七年為天福元年敕命法制皆遵明宗之

舊以趙瑩為翰林學士承旨桑維翰為翰林學士權知
樞密使事劉知遠為侍衛馬軍都指揮使客將景延廣
為步軍都指揮使立晉國長公主為皇后 帝引兵圍
晉安數月糧竭馬死援兵不至唐將楊光遠安審琦勸
招討使張敬達降敬達曰吾受明宗及今上厚恩為元
帥而敗軍其罪已大況降乎今援兵早晚至且當俟之
若力盡勢窮諸君斬我出降未晚也光遠乘敬達無備
斬其首帥諸將出降

案原書作諸軍畢集光遠殺敬達以其首降考之通鑑乃楊光遠欲

殺敬達高行周等常引壯騎衛之諸將每旦集招討使營是日適高行周等未至光遠乃乘其無備而殺之隆禮不全用通鑑之大而約之曰諸軍畢集於事情殊為違反又以諸將為諸軍亦非今並改正帝嘉敬

達之忠命收葬而祭之謂羣臣及晉諸將曰汝曹為人

臣當倣敬達也帝與晉主引兵而南晉主以齊王重貴

重貴乃高祖兄敬儒之子

為北京留守帝以高謨翰為先鋒與降卒

皆進至團栢與唐兵戰唐兵大潰死者萬計晉主自

太原入洛陽帝親送至潞州唐盧龍節度使北平王趙

德鈞及其子樞密使延壽皆來降

案原書繫此條於晉主將發潞州之後今

考通鑑太宗與晉主引兵向南至潞州降趙德鈞父子始令晉主入洛而太宗北還原書顛倒失實又趙德鈞仕唐為盧龍節度使封北平王趙延壽為樞密使原書作樞密使趙德鈞亦誤今並改正晉主將發

潞州帝舉酒屬之曰我若南向河南之人必大驚駭汝宜自引漢兵南下我令大詳裒將五千騎衛送汝至河梁余且留此俟汝音問有急則下山救汝洛陽既定吾將北返矣因執手而泣久之不能別解白貂裘以衣晉主并贈良馬二千匹戰馬一千二百匹曰世世子孫勿相忘又曰劉知遠桑維翰趙瑩皆創業功臣無大故勿

相棄也先是趙德鈞陰遣人說帝求立為中國主帝指
穹廬前巨石謂德鈞使者曰我已許石郎矣石爛可改
也帝至潞州鎖德鈞父子而去舒嚕太后見之問曰汝
父子自求為天子何耶德鈞慙不能對悉以田宅之籍
為獻后問何在曰幽州后笑曰幽州屬我也何獻之為
德鈞益慙自是鬱鬱不多食踰年而死德鈞既卒帝釋
延壽而用之

紀異錄曰契丹太宗嘗晝寢夢一神人花冠美姿容

輜輶甚盛忽自天而下衣白衣佩金帶執骨朶有異獸十二隨其後內一黑色兔入太宗懷而失之神人語太宗曰石郎使人喚汝汝須去覺告太后忽之不以爲異後復夢即前神人也衣冠儀貌宛然如故曰石郎已使人來喚汝既覺而驚復以告太后太后曰可命筮之乃召巫筮言太祖從西樓來言中國將立天主要爾爲助爾須去未浹旬唐石敬瑭反於河東爲張敬達所敗亟遣趙瑩持表重賂許割燕雲求兵

為援帝曰我非為石郎興師乃奉天帝敕使也率兵
十萬直抵太原唐師遂歟立石敬瑭為晉帝後至幽
州城中見大悲菩薩佛相驚告太后曰此即向來夢
中神人冠冕如故但服色不同耳因立祠木葉山名
菩薩堂

唐主從珂命河陽節度使葛從簡與趙州刺史劉在明
守河陽南城遂斷浮梁歸洛陽殺人皇王托雲於其第
晉主至河陽葛從簡迎降舟楫已具唐主議復向河陽

將校皆已飛狀迎晉主晉主慮唐主西奔遣我兵千騎
扼澠池唐主與曹太后劉皇后并子雍王重美及宋審
虔等攜傳國寶登元武樓唐主自焚年五十一劉皇后
欲燒宮室重美諫曰新天子至必不露居他日重勞民
力死而遺怨乃止后與重美俱死是日晚晉主入洛陽
唐兵皆解甲待罪晉主命知遠部署京城知遠分漢軍
使還營館我兵於天宮寺城中肅然無敢犯令 十二
月晉追廢唐主從珂為庶人以馮道同平章事

丁酉 天顯十二年春正月乙卯日食

案原書但云正月日食通鑑考異引五代

實錄是年正月甲寅朔乙卯日食十國紀年蜀乙卯朔日食蓋晉人避元旦日食故移朔日其實當以十國紀年所載為正遼史閏考是月係甲寅朔日食在二日蓋亦以避日食而移朔日也今增乙卯二字以

趙延壽為樞密使尋兼政令事

後封燕王

帝遣使如洛陽取

延壽妻唐燕國長公主以歸

案原書作唐國長公主今考延壽妻乃唐明宗女燕

國長公主非唐國也今改正

二月帝班師過雲州節度使沙彥珣

出迎帝留之判官吳蠻在城中其衆推蠻領州事閉城不受命攻之不克應州郭崇威亦挺身南歸翰林學士

張礪本趙德鈞判官軍敗來歸帝見其文采擢任之

案原

書但記張礪亡歸事而礪初歸違不載則于事之本未不具今據違史補礪乘間亡歸為追

騎所獲帝責之曰汝何故亡對曰臣不習北方土俗飲食居處意常鬱鬱是以亡耳帝顧通事高唐英曰吾常戒汝善遇此人何故使之失所而亡若失之安可復得耶答唐英而謝之礪甚忠直遇事輒言無隱帝甚重之

三月晉得故唐主從珂臂及髀骨以王禮葬之于徽陵南夏四月晉遷都汴州五月吳徐知誥欲來相結

國取中國遣使以美女珍玩泛海修好帝亦遣使報之
秋七月吳徐知誥稱帝國號南唐復姓李改名曰昇
詔以幽州為南京大都為上京渤海扶餘城為東京

案遼東京乃遼陽本渤海金德縣地扶餘城本扶餘國
渤海為扶餘城遼改為黃龍府又改為通州雖並為渤
海舊地實非一所前以扶餘為東丹國此又以扶餘為
東京皆與遼史地理志不合今姑仍舊文而辨正之云

戊戌會同元年春正月朔日食 秋七月晉作受命寶以

受天明命惟德允昌為文 八月遣使冊晉主為英武

明義皇帝

原書稱遼帝遣使奉冊寶晉稱臣於
遼其遣使授冊安得稱奉今改正

九月晉

遣守司空馮道左散騎常侍韋勳來上皇太后尊號左

僕射劉煦右諫議大夫盧重來上皇帝尊號

案遼冊晉主遼史書

于八月通鑑書于十月晉使上遼尊號通鑑書於七月遼史書于九月由一據遣使之月一據使至之月故也

此書主記遼事應據遼史原書並據通鑑每事皆差二月有失事實今改正

冬十一月太

后御開皇殿受晉冊帝御宣政殿受冊大赦改元會同

案通鑑以改元會同為丁酉年事原書沿之以是年為會同二年考遼史改元實在冊禮既成之時于情事為

得今改正晉主事帝甚謹奉表稱臣謂帝為父皇帝每使至

即于別殿拜受詔敕每歲輸金帛三十萬之外吉凶慶

弔歲時贈遺相繼於道乃至太后元帥太子諸王大臣皆有贈遺然所輸金帛不過數縣租賦其後帝屢止晉主上表稱臣但令為書稱兒皇帝如家人禮

己亥會同二年秋七月朔日食八月晉以故唐明宗子許王從益為郇國公以奉唐祀

庚子會同三年初晉割雁門北州郡來獻由是吐谷渾皆內屬晉成德節度使安重榮誘之南歸春正月吐谷渾帥其部落千餘帳奔晉帝大怒遣使讓晉主以招納叛

人晉主遣兵逐之使還故土

辛丑會同四年夏六月晉安重榮以其主稱臣為恥見使

者至必箕踞慢罵或潛遣人殺之帝以為讓晉主為之

遜謝後重榮執遼使蘇拉遣輕騎掠幽州南境上表稱

吐谷渾兩突厥渾契苾沙陀各帥部眾歸附名國等

亦納遼告牒言為遼所陵暴願自備十萬眾與晉擊遼

晉主不許

壬寅會同五年夏六月帝以晉招納吐谷渾屢遣使責讓

晉主憂悵成疾一旦馮道獨對晉主命幼子重睿出拜之又令宦者抱置道懷中蓋欲道輔立之是月晉主殂年五十一馮道與侍衛馬步都虞候景延廣議以國家

多難宜立長君乃奉齊王重貴嗣位

案原書此下有是日即位四字亦襲

通鑑舊文然通鑑上云乙丑所云是日乃蒙上而
言此上文不言乙丑則是日二字為贅今刪正

晉

高祖既殂其大臣議奉表稱臣來告哀景延廣請致書稱孫而不稱臣李崧曰陛下如此他日必躬擐冑甲與遼戰於時悔無益矣延廣固爭馮道依違其間晉主卒

從延廣議帝大怒遣使如晉責讓延廣復以不遜語答之
盧龍節度使趙延壽欲代晉帝中國屢說帝擊晉
帝頗然之

癸卯會同六年

晉主重貴仍稱天福八年

春二月晉主聞帝將南伐遂

還東京然問遺相往來猶無虛月是月南唐主昇殂

齊王璟立夏四月朔日食秋九月先是河陽牙將

喬榮從趙延壽來歸帝以榮為回圖使往來販易于晉

置邸大梁至是景延廣說晉主囚榮於獄凡遼國販易

在晉境者皆殺之奪其貨大臣皆言遼國不可負晉主乃釋榮慰賜而歸之榮辭延廣延廣大言歸語而主先帝為北朝所立故稱臣奉表今上乃中國所立所以降志於北朝者正以不敢忘先帝盟約故耳為鄰稱孫足矣無稱臣之理翁怒則來戰孫有十萬橫磨劍足以相待他日為孫所敗取笑天下無悔也榮乃曰公所言頗多恐有遺忘願記之紙墨延廣命吏書其語以授之榮具以白帝帝大怒南伐之志始決晉使至者皆繫之桑維

翰屢請遜辭謝違每為延廣所沮晉主以延廣有定策
功又總宿衛兵故大臣莫能與之爭河東節度使劉知
遠知延廣必致釁而不敢言但益募兵增置十餘軍以
備冬十二月晉平盧節度使楊光遠遣騎密來告以
晉境大饑乘此攻之一舉可取趙延壽亦勸之帝乃集
兵五萬使延壽將之經略中國曰若得之當立汝為帝
延壽信之為盡力晉主頗聞其謀遣使徵近道兵以備
之

甲辰會同七年

晉主重貴開運元年

春正月以趙延壽趙延照為前

鋒將兵伐晉圍貝州先是晉以貝州水陸要衝多聚芻粟為大軍數年之儲軍校邵珂性兇悖節度使王令溫黜之珂怨望密遣人來言貝州易取會令溫入朝執政以吳巒權知州事帝親攻貝州巒悉力拒之燒攻具殆盡珂引兵自南門入巒赴井死遂克貝州所殺且萬人晉以高行周為都部署與符彥卿皇甫遇等將兵來禦晉主遣使齎書遺帝時帝已屯鄴都不得通而返晉

主至澶州帝屯元城別遣將攻太原晉詔劉知遠杜威馬全節張彥澤等將兵拒於黎陽復遣譯者孟守忠致書於帝求修舊好帝復書曰已成之勢不可改也會偉

王在秀容失利太原諸軍自鴉鳴谷與大軍會

案原書作遼帝

自鴉鳴谷歸通鑑則作契丹自鴉鳴谷遁去胡三省註云自鴉鳴谷出潞州東與契丹主大軍合蓋通鑑所指乃太原諸軍遼帝並未北歸也隆禮所紀舛錯殊甚今改正 博州刺史周儒以城降

二月周儒引滿達自馬家口濟河營於東坼攻鄆州北津晉主自將兵及遣李守貞等分道來擊我師敗績

三月帝僞棄元城去伏精騎於古頓邱城以俟晉軍
與恒定之兵合而夾擊晉軍欲進追會霖雨而止我兵
設伏旬日人馬饑乏趙延壽曰晉軍悉在河上畏我鋒
銳必不敢前不如即其城下四合攻之奪其浮梁則天
下定矣帝從之親將兵十萬餘陣於澶州城北與晉高
行周合戰自午至晡互有勝負帝以精兵當中軍而來
晉主亦出陣待之帝望見晉軍之盛謂左右曰楊光遠
言晉軍半已餒死今何其多也以精騎左右掠陣晉軍

不動萬弩齊發飛矢蔽地帝稍却兩軍死者不可勝數
昏後各引去帝自澶州北分為兩軍一出滄德一出深
冀而歸時帝帳中有小校亡入晉云帝已傳木書收軍
北去景延廣疑有詐閉壁不敢追帝北歸留趙延照為
貝州留後 夏四月晉因出兵拒守國用愈竭遣使三
十六人分道括率民財各封劍以授之使者多從吏卒
攜鎖械刀仗入民家大小驚懼求死無地州縣吏復因
緣為姦 先是晉楊光遠叛命兗州修守備節度使安

雷信亦以治樓堞為名率民財以實私藏民力大困

晉遣李守貞討楊光遠于青州帝遣兵救之不克 秋

九月朔日食 帝遣兵攻晉遂城樂壽及代州刺史白

文珂戰于七里烽我師敗績 冬十月晉師圍青州經

時城中食盡餓死者大半待援兵不至楊光遠遙稽首

於帝曰皇帝皇帝誤光遠矣其子承勳勸光遠降冀州

全其族光遠不許承勳乃斬勸其父反者判官邱濤送

其首於守貞縱火大譟劫其父出居私第上表待罪聞

城納官軍 閏月晉以楊光遠罪大而諸子歸命難於

顯誅命守貞便宜從事守貞遣人拉殺光遠以病死間

起復其子承勳除汝州防禦使

原書於此條引胡安國論詞意偏繆謹遵

聖諭刪

正

是月帝復大舉攻晉趙延壽引兵先進至邢

州

欽定重訂契丹國志卷二

欽定四庫全書

欽定重訂契丹國志卷三

太宗孝武惠文皇帝下

己會同八年春正月帝將兵攻邢洺磁三州至於安陽
河千里之內焚殺殆盡帝見大桑木罵曰吾知紫披襖
出自汝身吾豈容汝活耶束薪於木而焚之 時晉主
病不能出軍遣張從恩馬全節安審琦皇甫遇悉兵陳
於相州安陽水之南皇甫遇與濮州刺史慕容彥超將

數千騎前覘至鄴都遇我師數萬遇等且戰且却至榆林店我師大集二將死戰自午至未百餘合殺傷甚衆日且暮安陽諸將怪覘兵不還安審琦即引騎兵出我師自相驚曰晉軍悉至遂引軍退時帝在邯鄲聞之即時北去二月我兵自恒州還以羸兵驅牛羊過祁州城下晉刺史沈斌出兵邀擊我以精兵奪其門州兵不得還趙延壽引兵急攻之斌在城上延壽語之曰使君何不早降斌曰侍中父子失計陷身北廷忍帥兵以殘

父母之邦不自愧恥更有驕色何哉沈斌弓折矢盡寧

為國家死耳終不效公所為明日城陷斌自殺

案原書此下有

三月遼師還軍南下晉都排陣使符彥卿等來擊遼師敗走一條今考通鑑此即係四月中遼太宗自虎北口

還師戰于陽城之事隆禮蓋雜引諸書以致複出今刪正

夏四月晉杜威等諸軍

會於定州攻陷秦州取滿城獲二千人進取遂城帝還

至虎北口聞晉取秦州復擁八萬騎南向威等聞之懼

退走陽城遼師大至晉兵來拒搏戰十餘里遼師踰白

溝而去晉兵結陣而南至白團村埋鹿角為行寨遼師

圍之數重奇兵出寨後斷糧道是夕東北風大起營中
人馬俱渴掘井輒崩至曙風甚帝坐奚車中命鐵鷄四
面下馬拔鹿角而入奮短兵以擊晉兵又順風縱火揚
塵以助其勢晉諸將憤怒皆願出一戰符彥卿等引精
騎出西門諸將繼至我師卻數百步風勢益甚昏晦如
夜彥卿等擁萬餘騎橫擊我師號呼聲動天地我師不
利帝退還幽州散兵稍集帝以軍失利杖諸將戰不力
者各數百諸軍引歸晉主亦還大梁

案原書此下有六月晉遣使如遼一

條今考通鑑及五代史此即下文張禪使遼之事而上下視出並非一月兩遣使也今刪正

時連

歲南伐晉人疲於奔命邊民塗地人畜多死國人亦厭
苦之舒嚕太后謂帝曰使漢人為我國主可乎曰不可
太后曰然則汝何故欲為漢帝曰石氏負恩不可容后
曰汝今雖得地不能居也萬一蹉跌悔所不及又謂羣
下曰漢兒何得一餉眠案通鑑五代史並作一向眠文義較長但書中此語兩見並作
餉字存之以博異義自古但聞漢和蕃不聞蕃和漢漢兒果能回
意我亦何惜與和晉桑維翰屢勸其自主復請和以紓

國患六月遣供奉官張暉

案原書作張徽今據通鑑及五代史改正

奉表稱

臣卑辭謝過帝曰使景延廣桑維翰自來仍割鎮定兩道隸我則可和晉主以帝語憤謂無和意乃止及帝入大梁謂李崧等曰向使晉使再來則南北不戰矣秋

八月朔日食

丙午會同九年春二月朔日食夏四月晉定州指揮使

孫方簡請內附六月遣兵攻晉定州晉遣李守貞為

都部署將兵來禦秋八月晉張彥澤敗我師於定州

北 冬十月晉遣杜威李守貞將兵來攻 十一月晉
帥杜威李守貞會兵至瀛州城門洞啓寂若無人威等
不敢進聞高謨翰已引兵潛出威遣梁漢璋將二千騎追
之漢璋敗死威等遂引兵遁還 十二月帝詔大舉南
伐引兵趨恒州晉杜威等聞之將自冀貝而南張彥澤
時在恒州引兵會之言遼兵可破之狀威等乃復趨恒
州以彥澤為前鋒與遼兵夾滹沱而軍帝恐晉軍渡河與
恒州合勢議引兵還及聞晉軍築壘為持久計遂不去

晉磁州刺史李穀說杜威及李守貞曰今大軍去恒
州咫尺烟火相望若多以三股木置水中積薪布土其
上橋可立成密約城中舉火相應夜募壯士砍敵營而
入表裏合勢逃遁必矣諸將皆以為然獨杜威以為不可
遣穀出督懷孟軍糧帝自以大兵當晉軍之前潛遣蕭
翰將百騎出晉軍之後斷晉糧道及歸路遇樵採者悉
擒之有逸歸皆稱遼師之盛又獲晉民皆黥其面曰奉
敕不殺縱之南走運夫在道遇之皆棄車驚潰李穀

密奏晉主具言遼兵危急之勢請幸滑州及發兵守澶
州河陽以備奔衝杜威亦奏請益兵晉主悉發守宮禁
者數百人赴之威又遣使告急還為我兵所獲自是晉
主與軍前聲聞兩不相通晉開封府尹桑維翰以國家危
在旦夕求見言事晉主方在苑中調鷹辭不見又詣執
政言之執政不以為然退謂所親曰晉氏不血食矣 晉
主欲自將出師李彥韜諫而止 晉奉國都指揮使王
清戰死杜威與李守貞宋彥筠等謀來降威潛遣腹心

詣軍前邀求重賞帝給之許以中國與之為帝威喜遂
定降計召諸將出降表使署名乃命軍士出陳於外軍
士皆踴躍決為一戰及告以出降令其釋甲軍士大哭
聲振原野帝遣趙延壽衣赭袍至晉營慰撫士卒亦以
赭袍衣杜威其實戲之耳威引帝至恒州城下順國節
度使王周出降帝引兵自邢相而南案原書作自易定趙恒州今考易定
至恒乃遼帝自幽州南向之路此時已得恒州不應反
北道易定通鑑原文實作自邢相而南胡三省謂依山
南下以臨晉者是也隆禮妄改通鑑訛謬尤甚今訂正威將降兵以從遣張彥澤

將二千騎先取大梁以通事傳住兒為都監杜威之降也皇甫遇初不預謀帝欲遣遇先入大梁遇辭退謂所親曰吾位為將相敗不能死何面目復南行至平棘遂扼吭而死是月張彥澤倍道疾驅夜渡白馬津晉主召李崧馮玉李彥韜入禁計事欲詔劉知遠發兵入援明日彥澤自封邱門斬關而入城中大擾晉主於宮中起火自攜劍驅後宮十餘人將赴火為嬖人薛超所持俄而彥澤自寬仁門傳帝與太后書慰撫之乃命滅火與

后妃聚泣召范質草降表自稱孫男臣重貴禍至神惑
運盡天亡今與太后及妻馮氏舉族面縛待罪遣男延
煦延寶奉國寶出迎太后亦上表稱晉室皇太后李氏
妾傳住兒入宣帝詔晉主脫黃袍衣素服再拜受宣帝
又賜晉主以手詔且遣嘉哩謂之曰孫無憂管取一喫
飯處晉主上表謝恩帝又詰以所獻傳國寶非真晉主
奏頃唐潞王從珂自焚舊傳國寶不知所在此先帝所
為羣臣備知乃止有司欲使晉王銜璧牽羊大臣輿觀

迎於郊外帝曰吾遣奇兵直取大梁非受降也不許又
詔晉文武羣僚一切如故朝廷制度並用漢禮晉王使

人名彥澤彥澤笑而不答

案原書此下有且名桑維翰
景延廣一句今考通鑑原文

此語實在彥澤傳語慰撫之下蓋彥澤以遼帝命名
之非晉主名之也隆禮移改舊文殊失事實今刪去或

勸桑維翰逃去維翰曰吾大臣逃將安之坐而俟命彥

澤以晉主命名之維翰至天街遇李崧駐馬語未畢有

軍吏於馬前揖維翰赴侍衛司維翰知不免顧謂李崧

曰侍中當國今日國亡反令維翰死之何也崧有愧色

彥澤踞坐見維翰維翰切責之曰去年拔公於罪人之
中復領大鎮授以兵權何乃負恩至此彥澤無以應遣
兵守之彥澤縱兵大掠二日都城為之一空彥澤自謂
有功旗幟皆題赤心為主見者笑之彥澤迫遷晉主於
開封府頃刻不得留見者流涕晉主與太后皇后肩輿
宮嬪宦者十餘人皆步從以內庫金珠自隨彥澤曰此
物不可匿也晉主悉歸之彥澤悉輦以歸私第彥澤遣
控鶴指揮使李筠以兵守晉主內外不通所上表章

皆先示彥澤乃敢發晉主使取內庫帛主者不與曰此
非帝之物也求酒於李崧崧曰臣家有酒非敢惜慮陛
下憂躁飲之有不測之虞所以不敢進欲見李彥韜彥
韜亦不往晉主姑烏氏公主私賂守門者得入與晉主
訣歸第自經死 帝初渡河晉主欲郊迎張彥澤遣白
帝帝報曰天無二日豈有兩天子相見於道路耶乃止
晉皇子延煦母楚國夫人丁氏有美色彥澤使人劫
取之彥澤殺桑維翰以帶加頸白帝云其自經帝命厚

撫其家高行周符彥卿皆來降帝以陽城之敗責之彥卿曰臣當時惟知為晉主竭力今日死生惟命帝笑而釋之帝又遣兵趨河陽捕景延廣延廣見帝於封邱帝責之曰致兩主失歡皆汝所為也十萬橫磨劍安在召喬榮使相辨證榮出衣襟所藏書乃以十事責延廣每報一事授一牙籌授至八籌帝叱鎖之命押送歸本國宿陳橋夜分扼吭而死

丁未大同元年

後漢高祖知遠仍稱天福十二年

春正月朔帝備法駕入

汴晉文武百官遙辭其主于都城北遂素服紗帽迎降
俯伏路側請罪帝命起改服撫諭之晉主重貴及太后
迎於封邱門外帝辭不見館于封禪寺遣崔延勲以兵
守之是時雨雪連旬外無供億上下凍餒晉太后使人
謂寺僧曰吾嘗於此飯僧數萬今日豈不相憫耶僧辭
以遼帝之意難測不敢獻食晉主陰祈守者乃稍得食
帝初入門民皆驚走帝登城樓遣通事諭之曰我亦
人也汝曹勿懼會當使汝曹蘇息我無心南來漢兵引

我至此耳至明德門下馬拜而後入晉宮中嬪妃迎謁
皆不顧日暮復出屯於赤岡執楊承勲責其劫父楊光
遠以叛脅而食之先是張彥澤與晉閭門使高勲有
隙乘醉入其家殺其叔父及弟而去及帝至京師聞彥
澤劫掠怒而鎖之高勲與百姓亦爭投牒疏其惡帝命
斬之北市仍令高勲監刑彥澤前所殺士大夫子孫皆
經杖哭隨詬罵以杖扑之彥澤俯首無一言行至北市
斷腕出鎖然後用刑勲命割其心祭死者市人爭破其

腦取髓齏其肉而食之 帝初入宮諸門皆用兵守衛
磔犬於門以竿懸羊皮於連為厭勝法謂晉羣臣曰自
今不修甲兵不市戰馬輕賦省役天下太平矣改服中國
衣冠百官起居皆如舊制以李崧為太子太師充樞密
使馮道守太傅於樞密院祇候分遣使者以詔賜晉之
藩鎮大臣爭上表稱臣惟彰義節度使史匡威據涇州
拒命而雄武節度使何重建以秦階成州降蜀 帝悉
收晉降卒鎧仗貯恒州驅馬歸北邊欲以鐵騎擁降卒

而納之河流趙延壽勸分以戍邊由是得免散遣還營

詔降晉主重貴為光祿大夫檢校太尉封負義侯遷

於黃龍府

即慕容氏和龍城也。案黃龍府本渤海之扶餘城在遼水之東和龍城據晉書及水經

注為漢唐之柳城縣在遼水之西非一地也但隆禮此註本沿通鑑故姑仍其舊云

帝使人謂晉

太后曰吾聞爾子重貴不從母教而至於此可求自便

勿與俱行太后答曰重貴事妾甚謹所失者違先君之

志絕兩國之歡然重貴此去幸蒙大惠全生保家母不

隨子欲何所歸於是晉太后與馮后皇弟重睿子延煦

延寶舉族從重貴而北以宮女五十宦者三十東西班五十醫官一控鶴官四御厨七茶酒司三儀鸞司三軍士二十人從衛以騎兵三百又遣趙瑩馮玉李彥韜與之俱所經州縣皆故晉將吏有所供饋不得通路傍父老爭持羊酒為獻衛兵擁隔不使得見皆涕泣而去舊臣亦無敢進謁者獨磁州刺史李穀迎謁於路傾貲以獻重貴至中度橋見杜威寒嘆曰天乎我家何負於汝為此賊所破慟哭而去帝廣受四方貢獻大縱酒作樂

趙延壽請給上國兵食帝曰吾國無此法乃縱兵四出
剽掠謂之打草穀丁壯斃於鋒刃老弱委於溝壑自東
西兩畿及鄭滑曹濮數百里間財富殆盡 晉北面行
營都統劉知遠遣客將王峻奉表稱臣帝詔褒美親加
兒字於知遠姓名之上仍賜以木拐國法以優禮大臣
如漢賜几杖之比 荆南節度使高從誨遣使入貢唐
主遣使賀帝滅晉且請詣長安修復諸陵帝不許 二
月朔帝冠通天冠絳紗袍執大圭視朝南人皆法服北

人仍國服立於文武班中間百官朝賀帝問百官曰中國之俗異於吾國吾欲擇一人君之何如皆曰夷夏之心皆願推戴皇帝於是下制以晉國稱大遼大赦天下燕王趙延壽以帝負約心常怏怏乞為皇太子帝曰吾於燕王無所愛惜雖我皮肉可為燕王用者吾亦割也吾聞皇太子當以天子兒為之燕王豈得為之因令為延壽遷官張礪奏擬為中京留守大丞相錄尚書事都督中外諸軍事帝取筆塗去錄尚書事都督中外諸

軍事而行之 晉劉知遠稱帝於晉陽自言未忍改晉

又惡開運之名乃更稱天福十二年

案原書作自言未忍改晉國開運之

名乃更稱天福十二年漢主既未忍改開運之名何以轉稱天福考之通鑑實因惡開運之名而更稱天福也

隆禮刪去又惡二字文義全乖今改正

詔諸道為遼國括率錢帛者罷之

劉知遠自將東迎故晉主重貴至壽陽聞已過數日

乃留兵戍承天軍而還重貴自幽州十餘日過平州沿

途無供給饑不得食遣宮女從官採木實野蔬而食又

行七八日至錦州衛兵迫拜太祖畫像重貴不勝屈辱

呼曰薛超悞我不令我死馮后求毒藥欲與重貴俱自死
不果又行五六日過海北州至東丹王墓遣延煦拜之又
行十餘日渡遼水至渤海國鐵州又行七八日過南海
府遂至黃龍府 帝聞劉知遠稱帝遣耿崇美守澤潞
高唐英守相州崔延勲守河陽以控扼要害潞陽賊帥
梁暉夜遣壯士踰相州城啓關納衆殺守兵數百據州
自稱留後鎮寧節度使耶律朗烏性殘虐澶州人苦之
賊帥王瓊帥其徒千餘人圍朗烏於牙城帝聞之懼遣

兵救之瓊敗死帝是自無久留河南之意矣 舒魯太后遣使以國中酒饌脯果賜帝賀平晉國帝與羣臣宴於永福殿每舉酒立而飲之曰太后所賜不敢坐飲

三月朔帝服赭袍坐崇元殿百官行入閣禮 帝謂晉百官曰天時向暑吾難久留欲暫至上國省太后乃以汴州為宣武軍以蕭翰為節度使翰舒魯太后之兄子其妹復為帝后始以蕭為姓自是后族皆稱蕭氏 帝發大梁晉文武諸司諸軍吏卒從者皆數千人宮女宦

官數百人盡載府庫之實以行謂宣徽使高勲曰吾在上國以射獵為樂至此令人悵悵今將歸死無恨矣

夏四月帝攻相州克之悉殺城中男子驅其婦人而北留高唐英守之城中遺民僅七百人而髑髏十餘萬

帝自大梁北歸行至高邑得疾崩於樂城喪車至國舒魯太后不哭曰待諸部寧一如故則葬汝矣 九月葬

帝於木葉山

案遼史大同元年四月太宗崩九月葬五代史亦言是年葬太宗原書謂明年八月

葬實為繆誤今改正

帝在位凡二十一年廟號太宗統和二十六

年上尊諡孝武皇帝重熙二十一年加諡孝武惠文皇

帝

案原書云諡曰嗣聖皇帝考遼史太宗至統和方有諡穆宗至重熙方有諡嗣聖乃尊號中二字非諡也

蓋遼初質樸即以生前尊號為沒後之稱如商時諸王天乙武丁之類亦生沒皆稱之也隆禮傳聞誤以為諡

今據遼史改正

紀異錄曰遼太宗在樂城病時上京西八十里山有

獵人見太宗容貌如故乘白馬追奔一白狐因射殺

之獵人驚國主南征未回何忽至此因獲其死狐并

箭失國主所在不決旬而凶問至驗其日乃得疾之

日驗其箭則國主南征所帶之箭失其一矣國人於
其地置堂塑白狐形并箭在焉名曰白狐堂今其陵
之側創置懷州是也

案原書於太宗紀中引胡安國
論凡十條其中立論偏駁者業

奉

聖訓刪正其餘亦並係論後唐及晉事與遼無與今悉

行刪

去



欽定重訂契丹國志卷三

欽定四庫全書

史部

欽定重訂契丹國志卷八

四至

詳校官庶吉士

臣張溍

編修臣裴謙覆勘

總校官舉人

臣章維桓

校對官編修

臣孫希旦

謄錄監生

臣曾鏞

欽定四庫全書

欽定重訂契丹國志卷四

世宗孝宗莊憲皇帝

世宗皇帝諱阮小字烏雲太祖孫人皇王托雲之子也

人皇王歸唐為唐主從珂所害

案原書作卒于滑州今考托雲奔唐後居洛陽

唐時王以太宗助晉起兵遣人殺之于私第遼史及通鑑並同此書卷二內亦有其事此乃以為卒于滑州前

後有晉金飛太宗南入大梁烏雲從駕封永康王大同

元年四月太宗北歸崩於藥城燕王趙延壽恨太宗負

許代中國之約即日引兵入恒州帝以所領兵繼入時
諸將已密議奉帝為主登鼓角樓受叔兄拜而延壽不
之知自稱受太宗遺詔權知南朝軍國事下教布告諸
道所以供饋帝與諸將同帝銜之鎮州諸門管鑰與夫
倉庫出納皆帝親掌之或說延壽曰遼諸大人諸日聚
謀此必有變今漢兵不下萬人不若先事圖之

案通鑑
云今漢

人不下萬人言其力足以制敵也原
書作漢兵不滿萬辭義違反今改正延壽不決下令以

來月朔日於待賢館上事受賀大臣李崧等以事理難

測不可行此禮乃止

丁天祿元年

案是年即大同元年世宗即位後改天祿隆禮誤以次年為天祿元年而以是年為

會同十一年與史不合今改正

夏五月帝召趙延壽張礪李崧馮道於

所館飲酒帝之妃素以兄事延壽酒數行帝從容謂延壽曰妹自上國來寧欲見之乎延壽與俱入食頃帝出笑謂張礪等曰燕王謀反已鎖之矣諸君可無慮矣又曰先帝在汴州與我算子一莖許我知南朝軍國事昨日臨崩別無遺詔燕王安得擅立邪間一日帝至待賢

館受蕃漢官謁賀因笑謂張礪等曰燕王果於此即位
吾以鐵騎圍之諸公亦不免矣後數日集蕃漢諸臣於

府署宣太宗遺制曰永康王大聖皇帝之嫡孫人皇王

之長子太后鍾愛羣情允歸可於中京即皇帝位

中京契丹

謂鎮州也于是舉哀成服既而易吉服見羣臣受賀更不復

行喪禮歌吹之聲不絕於內

案原書此下有是年猶稱會同句考是年太宗已改

大同世宗即位又改天帝以太宗有子在國已以兄子

天祿原書誤甚今刪去

襲位又無舒魯太后之命內不自安初太祖崩于扶餘

城舒魯后殺諸將數百人太宗復崩于境外諸將懼死乃謀奉帝勒兵北歸使滿達為中京留守以前武州刺史高奉明為安國節度使晉文武官及士卒悉留之獨以翰林學士徐台符李瀚及後宮宦者教坊人自隨

舒嚕太后聞帝立怒曰我兒南征東討有大功業其子在我側者當立汝父棄我走投外國乃大逆人也豈得立逆人之子為帝乎發兵拒之帝遣偉王為前鋒相遇于石橋太后以李彥韜為排陣使彥韜迎降於偉王太

后兵由是大敗帝幽太后于太祖陵側羣臣上尊號曰
天授皇帝以高勲為樞密使帝慕中華風俗多用晉臣
而荒於酒色侮諸宰執由是國人不附諸部數叛興兵
追討故數年不暇南征 先是舒嚕太后徙負義侯重
貴并其太后于懷密州去黃龍府西北一千五百里行
過遼陽二百里而舒嚕太后為帝所囚重貴與太后復
得還於遼陽稍有供給 蕭翰在大梁矯帝制命唐許
王從益知南朝軍國事召已赴恒州時從益及王淑妃

俱匿於徽陵下宮不得已而出翰立為帝帥諸將拜之
淑妃泣曰吾母子單弱如此而為諸公所推是禍吾家
也願諸公早迎新主自求多福勿以吾母子為意衆感
其言許王遣使奉表稱臣迎漢主劉知遠仍出居私第
漢主入洛汴州百官奉表來迎諭以受遼補署者皆
勿疑聚其告謀而焚之命鄭州防禦使郭從義先入大
梁清宮密令殺許王及王淑妃淑妃且死曰吾兒何罪
而死何不留之每歲寒食以一盂麥飯洒明宗陵乎聞

者泣下 漢主至大梁晉之藩鎮相繼降之復以汴州

為東京改國號曰漢仍稱天福年號曰余未忘晉也

案原

書此下有明年遼國改元天祿勾蓋誤以世宗為踰年改元與遼史不合今刪去

戊申天祿二年

漢隱帝承祐乾祐元年

春正月漢主知遠更名暉既

而有疾召蘓逢吉楊邠史宏肇郭威入受顧命曰承祐

幼弱後事託在卿輩又曰善防杜重威遂殂逢吉等秘

不發喪下詔稱重威父子因朕小疾謗議搖衆皆斬之

磔尸于市市人爭啖其肉 二月漢主第二子周王承

祐立時年十八

是為
隱帝

初帝北歸至定州以孫方簡為

大同節度使方簡怨恚不受命率其黨三千人保狼山

故寨攻之不克未幾遣使降漢漢主復其舊官使扞北

邊時滿達等焚掠定州悉驅其人棄城北還方簡自狼

山帥其衆數百還據定州于是晉末州縣內附者皆復

為漢有矣滿達既歸帝責其失守滿達不服曰朝廷徵

漢官致亂爾帝鴆殺之

案遼史滿達即額森天祿五年
執世宗自立不克而死此言滿

達為世宗所鴆蓋誤以
滿達與額森為二人也

夏四月帝至遼陽負義侯重

貴白衣紗帽與太后詣帳中上謁帝令重貴以常服見重貴伏地而泣自陳過咎帝使人扶起之與坐飲酒奏樂而帳下伶人從官望見故主皆泣下悲不自勝爭以衣服藥餌為遺 五月帝上厓取重貴所從宦者十五人東西班十五人及其子延煦而去 帝有妻兄沁諾爾聞重貴有女未嫁求之乃辭以幼後數日帝遣騎取之以賜沁諾爾 六月朔日食 厓北地尤高涼北人常以五月上厓避暑八月下厓至八月帝下厓故晉太

后自馳至霸州謁帝求於漢兒城側賜地種牧以為生
許之帝以晉太后自隨行十餘日遣與延煦俱還遼陽
西天祿三年春二月徙重貴及晉太后於建州中途安
太妃卒遺令焚骨為灰南向颺之庶幾遺魂得返中國
也自遼陽東南行千二百里至建州節度使趙延暉避
正寢以館之去建州數十里外得地五十餘頃重貴遣
從者耕以給食頃之太宗之子舒嚕王遣騎取重貴寵
姬趙氏聶氏而去夏四月太白晝見六月朔日食

冬十月遣兵攻漢河北漢遣郭威督諸將來禦

戊庚天祿四年秋八月故晉太后病無醫藥常仰天號泣

戟手罵杜重威李守貞曰吾死不置汝疾亟謂重貴曰
我死焚其骨送范陽佛寺是月后卒至周顯德中有人
南還者云故晉主及皇后諸子尚無恙其從者亡歸及
物故則過半矣 冬十一月朔日食 是月漢郭威反

漢主承祐出奔至趙村追兵已至漢主下馬入民家為

郭允明所弒郭威等率百官迎武寧節度使劉贊

高祖弟崇

子為主 十二月漢遣郭威來侵至澶州將發將士數

千人忽大噪曰天子須侍中自為之將士已與劉氏為

仇不可立也或裂黃旗以被威體共扶抱之呼萬歲推

立為帝威乃上漢太后牋請奉漢宗廟事太后為母下

書撫諭大梁士民勿有憂疑

案原書此下有遣故主贊于外館句考郭威迎贊未

至即自立旋弑之宋州並無遣於外館之事所載失實今刪去

太后詔廢贊為湘陰公

辛天祿五年

周太祖威廣順元年

春正月漢太后下詔授郭威監

國符寶遂稱皇帝國號曰周建元廣順 是月周主威

弒漢湘陰公贇於宋州漢高祖之弟劉崇稱帝於晉陽
仍用乾祐年號改名昀所有者并汾忻代嵐憲隆蔚沁
遼麟石十二州之地 二月帝聞北漢主立使招討使
潘伊納克遺其子劉承鈞書漢主使承鈞復書言本朝
淪亡欲循晉室故事求援帝大喜北漢主遂遣使來乞兵
夏四月帝遣使如北漢告以周使田敏來約歲輸錢
十萬緡北漢主使鄭珙以厚賂來謝致書稱姪請行冊
禮帝大喜命燕王舍音冊命北漢主昀為大漢神武皇

帝更命旻妃為皇后北漢主尋遣其翰林學士衛融等
來稱謝且請兵 秋九月北漢主自團栢攻周帝欲引

兵會之與諸將議于九十九泉諸部皆不欲南帝強之

行至新州之火神淀

案遼史世宗遇弒于歸化州祥古
山五代史言世宗被弒于大神淀

不言何州通鑑云被弒于新州火神淀火神淀蓋
即大神淀而字體訛異也此書蓋沿通鑑之文 燕王

舍音及偉王之子大寧王額森等率兵作亂弒帝而舍

音自立齊王舒魯逃於南山諸大臣奉之以攻舍音額

森殺之并其族黨立舒魯為帝改元應歷

案遼史額森
弒帝僭號舍

音方辭其妻扶入其幕遂從之是額森首惡而舍音乃從逆者也此書則謂舍音與額森弑帝而舍音自立又案遼史額森即滿達此書則謂滿達為帝所殺而額森弑帝以滿達與額森為二人又案遼史額森封泰寧王舍音封燕王此書天祚帝紀載蕭后言大寧王舍音皆與遼史不合皆當以遼史為確但此書載額森事前後舛誤非一今並仍舊文而辨正之云 帝在位凡五年葬醫巫閭山應歷

二年謚曰孝和皇帝廟號世宗統和二十六年加謚孝

和莊憲皇帝

案原書止書廟號不言上謚今據遼史補

欽定重訂契丹國志卷四

欽定四庫全書

欽定重訂契丹國志卷五

穆宗孝安敬正皇帝

穆宗皇帝諱璟小字舒嚕後更名明太宗之長子也太宗攻石晉入大梁留帝侍舒嚕太后太宗於大同元年四月崩於藥城諸將畏舒嚕太后殘虐遂立世宗世宗遇弒諸將共迎帝即位改元寶曆自火神淀入幽州遣使告於北漢北漢主遣樞密直學士王得中賀即位復

以叔父事帝請兵以擊晉州帝年少好遊戲不親國事
每夜酣飲達旦乃寐日中方起國人謂之睡王

辛亥應歷元年冬十月遣蕭伊濟將奚遼兵五萬會北漢

兵伐周北漢主自將兵二萬攻晉州三面置寨晝夜攻

之周巡檢使王萬敢與指揮使史彥超何徽共率兵來

拒周太祖議自將由澤州路與王峻會兵救之峻言陛

下新即位未可輕動乃罷

紫原書言周太祖自將救晉州考通鑑周主初謀觀征後

以王峻諫而

罷今據補正

十二月周王峻至晉州我兵與北漢兵戰

不利乃還 北漢土瘠民貧內供軍國外奉歲幣賦役
繁重民不聊生逃入周境者甚衆

壬子 應歷二年夏四月朔日食 六月幽州節度使蕭哈

沁 世宗之妻弟 陰納款于周會周多事不果降 秋九月我

兵攻冀州為周兵所拒 冬十月瀛莫幽州大水流民
入塞者四十萬口帝不之禁周主命所在賑給存處之
百姓被刦得歸者十五六

癸丑 應歷三年春正月我兵攻定州為周將楊宏昭所敗

夏六月張藏英叛降於周 秋八月周太祖得風痺

疾術者言宜散財以禳之於是築社稷壇建太廟於大

梁太祖享太廟纔及一室不能拜而退命晉王榮終禮

晉王本姓柴氏幼從姑長太祖家遂以為子

是夕宿南郊幾不救夜分小愈

甲寅應厯四年 周世宗崇顯德元年

春正月朔周太祖祀圜丘僅能

瞻仰致敬而已以晉王榮判內外兵馬事太祖疾篤晉

王榮入侍屢戒之曰昔我西征見唐十八陵無不發掘

者無他惟多藏金玉故也我死當衣以紙衣斂以瓦棺

礦中無用石以甃代之工人役徒皆和雇勿以煩民莖
畢募近陵民三十戶蠲其雜徭使之守視勿修下宮勿
置守陵宮人作石羊虎人馬惟刻石置陵前云周天子
平生好儉約遺令用紙衣瓦棺嗣天子不敢違也汝苟
或違吾不福汝是月太祖殂年五十一晉王榮立是為世宗
二月北漢主聞周太祖殂喜甚遣使來請兵帝遣武
定節度使楊衮將萬騎如晉陽北漢主自將兵三萬會
我師趣潞州節度使李筠領兵逆戰敗走夏五月周

主自潞州趣晉陽至其城下旗幟環城四十里武定節度使楊衮奔歸帝怒其無功囚之使數千騎屯忻代之間周遣符彥卿來擊我兵退保忻口彥卿等持勇輕進為我兵所敗死傷甚衆彥卿引兵還晉陽冬十一月北漢主昊殂其子承鈞遣使來告哀且求冊命於帝其上表稱男帝賜詔謂之兒皇帝

乙卯 應歷五年春二月朔日食

丙辰 應歷六年夏六月漢遣使來議軍事

按原書於此年
失載事實今據

遼史

補正

丁巳 應歷七年冬十一月遣侍中崔勲將兵會北漢同攻

周北漢遣李存瓌將兵會之攻周潞州至其城下而還

戊午 應歷八年夏五月朔日食

己未 應歷九年夏四月周主自將來攻 五月周將韓通

領兵大至取瀛莫易三州及益津瓦橋二關以益津關

為霸州以瓦橋關為雄州割容城歸義二縣隸之周主

趣幽州有疾乃還

按原書云取瀛莫易添雄霸六州考通鑑周世宗攻遼取瀛莫二州及益

津瓦橋二闕以益津置霸州以瓦橋置雄州又義武節度使孫行友取易州而未嘗取涿州也五代史職方考於易莫瀛二州云周有霸雄二州云周有世宗置而涿州則係之契丹原書兼言取涿州又不言以二闕置州並失事實

六月周主立其子宗訓為梁王

時年七歲

是月

今改正

周主殂年三十九廟號世宗子梁王立 秋九月帝遣使於南唐周泰州團練使荆罕儒募刺客使殺之南唐夜宴我使於清風驛酒酣起更衣久不返視之則失其首矣自是始與唐絕

庚申 應歷十年春正月我師會北漢兵南伐周邊吏以聞

周主宗訓遣殿前都點檢趙匡胤領宿衛諸將來禦次

陳橋驛諸將擁匡胤還自立為皇帝國號宋奉周主為

鄭王太后為周太后遷居西京

按原書載陳橋兵變事稱宋太祖為趙太祖殊

非宋臣之體叙述亦詳畧失當今俱依通鑑輯覽改正

夏五月朔日食是歲

宋太祖建隆元年

按原書分注宋年最乖史例今改依南北史例於歲末大書某帝某號元

年以符史法謹發其凡於此

辛酉 應歷十一年夏四月朔日食

壬戌 應歷十二年夏六月祠木葉山及潢河

癸亥 應歷十三年春二月老人星見 夏六月詔諸路錄

囚 是歲宋太祖乾德元年

甲子 應歷十四年夏四月黃龍府甘露降

按原書於此上三年並失載事

實今據遼史補

乙丑 應歷十五年春二月朔日當食不虧

丙寅 應歷十六年冬駐蹕黑山平淀

丁卯 應歷十七年春三月五星聚奎 夏六月朔日食

按原

書於此上二年失載事實今據遼史補

戊辰

應歷十八年秋七月北漢主劉承鈞寢疾召平章事

郭無為執繼恩

承鈞養子

手付以後事承鈞殂繼恩嗣位謚

承鈞為孝和皇帝

九月北漢主繼恩嗣位纔六十餘

日為郭無為所弑弟繼元立

亦承鈞養子

改元廣運是月

宋師入北漢境北漢上表來求援又遣將領軍扼團柏

谷為宋將李繼勳何繼筠等擊破之於同鍋河

按原書作同鍋

河考宋元通鑑續編目並作銅鍋蓋此水本名同過河後加水為洞渦又說變為銅鍋或亦作同鍋今改北

漢尋復攻宋大掠晉絳二州之境是時承會同之餘

威中原多事藩鎮爭強莫不遣使來求援以自存晉陽之北漢江南之李唐使車狎至饋遺絡繹帝以政昏兵弱不能應之帝體氣卑弱惡見婦人居藩時舒嚕太后欲為立妃帝辭以疾即位後嬪御滿前並不一顧朝臣有言椒房虛位者皆拒而不納左右近侍房帷供奉率皆閹人性好游畋窮冬盛夏不廢馳騁萬幾事繁蕝漢諸臣共莅之帝不以屑意是歲宋太祖開寶元年

已
應歷十九年

按隆禮書言穆宗在位十九年而編年乃盡於十八年蓋其外誤今據遼史補

正
春三月漢主劉繼元遣使乞封冊 初京東北有山

曰黑山曰赤山曰大保山山水秀絕麋鹿成群帝四時

遊獵不離此山瀛莫之失幽州急遞以聞帝曰三闕本

漢地今以還漢何失之有其神氣急緩不恤國事如此

逮至末年殘忍猜忌左右小有過愆至于親手刃之數

年之間重足屏息人人虞禍是日己巳如懷州獵獲熊

歡飲馳還行宮會醉素食不得欲斬庖人掌膳者恐禍

及因捧食以進挾刀弑帝於黑山下

按原書敘穆宗被弑事首尾不明今

據遼史

改正

帝在位凡十九年廟號穆宗重熙二十一年

上諡曰孝敬安正皇帝

按原書云諡曰天順皇帝此乃穆宗尊號非諡也今據遼史改

正

欽定重訂契丹國志卷五

欽定四庫全書

欽定重訂契丹國志卷六

景宗孝成康靖皇帝

景宗皇帝諱賢字賢寧小字密結世宗子也穆宗既為
帳下所弑諸臣迎帝即位上尊號天贊皇帝以南院樞
密使知政事令高勲守政事令封秦王侍中蕭守興為
尚書令封魏王每朝必命坐議國事納蕭守興女燕燕
為皇后先是火神淀弑逆之時舍音害世宗併及於

后復求帝殺之帝時四歲

按原書作九歲考遼史世宗被弒時景宗年四歲是年穆

宗即位改元應曆盡十九年景宗即位改元保寧盡十年明年改元乾亨盡四年止壽三十五今據改正御

厨尚食劉嘉哩以糴束之藏於積薪中由是得免及即

位嬰風疾多不視朝改元保寧

已保寧元年大赦境內刑賞政事用兵征討皆皇后決

已之帝卧牀榻拱手而已

庚午保寧二年春二月宋太祖命曹彬等伐北漢 夏四

月遣兵分道救北漢遇宋將何繼筠韓重贇來拒我師

敗績

辛未 保寧三年夏四月朔日食 冬十一月遣騎六萬攻

宋定州宋太祖命田欽祚領兵三千戰於滿城馬中流矢而踣騎士王超授欽祚馬復振乘勝至遂城我兵圍之數日欽祚度城中糧少整兵開南門突圍一角而出

按此條原書敘事疎外謹參考

宋史及宋元通鑑續綱目補正

壬申 保寧四年冬十月朔日食

癸酉 保寧五年秋九月朔日食

甲戌 保寧六年春三月周鄭王殂於房州宋人謚之曰恭

帝按原書作正月今據宋史及宋元通鑑綱目改正

乙亥 保寧七年按原書保寧盡六月次年即改乾亨與史不符今改正春二月朔日

食冬十一月邊臣貽宋雄州守孫全興書議和全興以聞於宋帝宋帝許之

丙子 保寧八年春三月帝遣使聘於宋夏六月彗出柳

長三四丈晨見東方西南指厯興鬼距室壁凡十一舍

八十三日乃滅秋七月朔日食宋初遣使來通聘

冬十月宋太祖崩年五十在位十七年皇弟晉王即

帝位是為太宗

按原書誤以此年之事分系兩歲疎舛尤甚今改正

是歲十二

月以後宋太宗太平興國元年

丁丑保寧九年夏四月宋葬太祖於永昌陵帝遣鴻臚少

卿耶律敵等如宋助葬宋遣起居舍人辛仲甫來報謝

右贊善大夫穆波副之時宋將用兵伐北漢仲甫遲留

境上未敢進宋詔趣行既至帝問曰聞中朝有党進者

真驍將如進之比凡幾人仲甫對曰名將甚多如進鷹

犬之材何可勝數帝頗欲留之仲甫曰信以成命義不可留有死而已帝知其秉節不可奪厚禮遣還冬十

一月朔日食

戊寅

保寧十年秋七月享太祖廟

按原書於此年失載事實今據遼史補

己卯

乾亨元年春二月宋帝親征北漢三月帝遣兵數

萬騎援北漢及宋將郭進戰於石嶺關之南我師敗績

夏六月北漢主劉繼元降宋

按原書誤以北漢降宋為四月事今據宋史改

正宋帝以兵來侵發鎮州

涿州判官劉厚德以城降

宋 秋七月宋帝至幽州攻城踰旬不下士卒疲頓轉輸回遠又恐救兵至遂退師 先是宋師自并至幽乘

我無備帝方獵急歸牙帳議棄幽薊以兵守松亭北崖

口而已時耶律遜寧號裕悅呼為錫里郎君

北朝親近無職事者

之請兵十萬救幽州並西山而入夜持兩炬朝舉兩旗

選精騎三萬夜從他道自宋軍南席卷而北遼兵先守

幽州者皆脆兵弱卒見宋師之盛望風而遁又為宋師

所遏進退無計反為堅守至是裕悅救至宋遂退師或

勸裕悅襲其後裕悅曰受命救幽薊今得之矣遂不復追初宋欲北侵遣使詔渤海王法發兵相應然竟無至者帝聞之遣使如渤海責問秋九月遣兵攻宋鎮州宋將趙延進來拒我師敗績

庚辰乾亨二年冬十一月帝發兵萬餘衆進攻關南宋河陽節度使崔彥進將兵來拒我師失利十二月宋太宗率師來侵至大名而還

辛巳乾亨三年大赦帝性仁懦雅好音律喜醫術鍼灸之

革授以節鉞使相者三十餘人自幼多疾沉疴連年四
時獵遊間循故典體憊不能親跨馬令節大朝會鬱鬱
無歡或不視朝者有之耽於酒色暮年不少休皇后以
女主臨朝國事一決於其手大誅罰大征討蕃漢諸臣
集衆共議皇后裁決報知於帝而已易定幽燕間兩大
戰烽書旁午國內惶惶帝嬰疾不能親駕基業少衰焉

秋九月朔日食

壬午乾亨四年春三月朔日食夏五月詔分兵三道伐

宋宋邊將來拒我師敗績 秋九月帝崩謚孝成皇帝

廟號景宗重熙加謚孝成康靖皇帝

按原書不書重熙加謚今據遼史補

正又按遼史景宗紀保寧盡十年乾亨盡四年則景宗在位凡十四年而聖宗為踰年改元開考保寧盡十年乾亨盡五年而興服志亦有乾亨五年之文則景宗在位凡十五年而聖宗為不踰年改元以聖宗前後諸帝即位改元之例證之則似表志為長以紀言景宗壽三十五者計之則似本紀為確隆禮原書景宗保寧盡六年乾亨盡九年凡在位十五年雖乾亨改元之歲誠為謬誤至其於景聖二宗終始之際雖異於紀而與表志未嘗不合也遼史本紀與表志之異已別無可據以質其得失故今雖改從本紀而於原書之有合於表志者仍附中其說以俟

大讀史者參考焉

欽定重訂契丹國志卷六

欽定四庫全書

欽定重訂契丹國志卷七

聖宗文武大孝宣皇帝

聖宗諱隆緒景宗之長子年十二即位改元統和尊母蕭氏為承天太后臨朝稱制凡二十七年乃歸政於帝宋楊業之陷康保裔王繼忠之敗與夫澶淵之後皆統和二十五年前事是時三四大戰帝雖親履行陣力戰深入而太后實未歸政也

於統和元年按原書統和元年下書帝即位考遼史聖宗紀景宗崩次日奉遺詔即位桓前其明

年乃為統和元年蓋古者人君踰年即位而稱元年後世以桓前即位為常禮則即位固不待改元矣若謂據遼史表志以景宗為不踰年改元則景宗崩以九月隆禮書帝即位於春二月之上又為退進無據今刪去

復國號大契丹 春二月朔日食

甲申 統和二年夏五日祠木葉山 是歲宋太宗雍熙元

年

乙酉 統和三年冬十二月朔日食

丙戌 統和四年春正月宋遣曹彬等分三道來侵曹彬趣

涿州

按原書云曹彬克遂州考遼遂州屬東京道非宋所能取宋遼史載曹彬攻遼亦初無取遂州事據

通考當作趣涿州與下文曹彬取涿州之文相為首尾今改正

田重進克飛狐靈邱二

縣及蔚州潘美克雲寰朔應四州宋尋命潘美楊業遷

雲寰朔應四州之民於許汝間時冀州防禦使大鵬翼

康州刺史馬贊馬軍指揮使何萬通皆為所擒

按馬贊原書說

作馬頤又諸將官位多與史不符今並據遼史改正

曹彬等亦連收新城固安取

涿州以糧食不繼退師我兵追之戰于歧溝闕宋人大

敗追至拒馬河溺死者不可勝紀夏六月朔日食

秋八月太后與大臣耶律漢寧南北皮室烏紳特哩袞領衆十餘萬復取寰州擒宋楊業

先是宋克雲朔襄應四州命潘美楊業遷四州之民於許汝以所部護送我兵邀擊之楊業力戰自日中至暮手刃數百人馬重傷不能進遂擒之業太息曰主上遇我甚厚何面目求活乃不食三日而死其麾下尚百餘人業慰遣之皆感泣不肯去遂俱死無生還者

冬十二月遣耶律遜寧以數萬騎取瀛州宋部署劉延讓來禦戰於君子館會天大寒宋師不能彀弓弩我兵圍延讓數重宋師覆沒延讓僅以身免擒宋平州團練使賀令圖高陽關部署楊重進兵勢益振遂長驅入深祁取易州復遣兵攻代州宋守臣張齊賢伏兵掩擊我師敗績

丁亥 統和五年春正月取宋深祁德易四州

按宋史太宗紀雍熙三年

十二月契丹陷祁深德三州四年入深祁德易等州此即統和四年五年事也蓋遼初入三州棄而不守故明

年入四州復有祁德但隆禮所
書與宋史稍有不同未知孰是

戊子統和六年冬十一月遣兵伐宋至唐河北宋守將定
州都部署李繼隆與監軍李繼忠來拒我師敗績是
歲宋太宗端拱元年

巳丑統和七年秋七月彗出東井凡三十日 帝遣兵攻

宋威虜軍宋將尹繼倫李繼隆來拒我師敗於唐徐河
間皮室戰沒大將裕悅被傷而還 九月鎮星熒惑入
南斗

庚寅統和八年春正月如臺湖是歲宋太宗淳化元年

按原書此年失載

事實今據遼史補

辛卯統和九年春閏二月朔日食

壬辰統和十年春二月朔日食

癸巳統和十一年春二月朔日食秋八月朔日食

甲午統和十二年冬十二月朔日食陰雲不見

乙未統和十三年春正月遣兵攻宋自振武入宋知府州

折御卿來拒我師敗于子河汭死亡甚衆夏四月遣

兵攻宋雄州宋守臣何承矩來拒我兵敗績 是歲宋
太宗至道元年

丙申 統和十四年春正月蠲三京及諸州稅賦

丁酉 統和十五年春三月宋太宗崩太子恒嗣位是為真

宗

戊戌 統和十六年春二月彗出營室北 夏五月朔日食

冬十月朔日食 是歲宋真宗咸平元年

己亥 統和十七年秋九月朔日食 冬十二月帝帥師南

伐宋帝自將來禦次于大名府我師至澶州為知冀州

張艾敗于城南

按張艾宋史作張晃

又為知府州折惟昌敗於五

合川是年宋定州都部署范廷召自中山來侵高陽

關都部署彰國節度使康保裔領兵赴之至瀛州西南

裴村而廷召後陣已與我師遇廷召遣人至保裔處乞

援保裔選精銳與廷召會日暮廷召潛師以遁保裔不

之覺遲明我師圍之數重保裔凡戰數十合兵盡矢窮

而死我師遂自德棣濟河掠淄齊而歸

按宋史咸平二年十月康保裔

與契丹戰死遼史統和十七年擒宋將康昭裔蓋即保裔也原書誤係于十八年且敘事亦多脫畧今據宋遼二史及通鑑

長編改正

庚子統和十八年春正月帝還南京

按原書作宋真宗攻大名府攻字蓋次字

之誤也然宋帝出次大名已見上年此為複出而遼帝還京原書不載殊為疎畧今刪去原文據遼史補入此條以適繁簡之宜

辛丑統和十九年冬十月帝遣兵攻宋宋張斌拒於長城

口我師不利又與李繼宣戰於山谷敗績

壬寅統和二十年秋七月朔日食

癸卯

統和二十一年春三月帝遣兵攻宋宋定州行營都
部署王超遣人約鎮州桑贊高陽關周瑩逆戰於望都
縣翼日至縣南六里副部署王繼忠率麾下死戰繼忠
素銜儀服我兵識之圍之數十重且戰且行傍西山而
北至白城擒之冬十一月有星孛於井鬼

甲辰

統和二十二年春三月帝遣兵伐宋宋將魏能來拒
我師敗績秋閏九月帝奉皇太后大舉南伐遣順國
王達蘭引兵掠宋威虜軍前鋒復為魏能所敗又攻北

平寨宋田敏等來拒我師少却遂東趨保州攻城不克
帝與太后合兵攻定州宋守將王超按兵不出陣於唐
河我兵東駐陽城淀又分兵圍岢嵐軍宋守臣賈崇力
禦乃還 冬十月我兵進攻瀛州宋守臣李延渥來拒
我兵失利死者三萬餘傷者倍之乃遣使如宋議和宋
遣崇儀副使曹利用使軍前定約 先是望都戰時擒
宋將王繼忠後稍親用授之以官繼忠乘間言和好之
利時太后年老頗有厭兵意雖以勁兵深入亦頗納其

說復遣小校李興等四人持信箭以繼忠書詣宋莫州
部署石普普奏諸宋帝宋帝手詔諭繼忠繼忠欲宋朝
先遣使命至是始遣曹利用來我師既去瀛州將乘虛
直搗貝冀天雄天雄軍聞之闔城惶遽宋都鈴轄孫全
照設備甚固我師進攻東門良久舍東門趨故城夜復
自故城潛師過城南設伏於狄相廟遂南攻德清軍宋
遣兵追擊伏發天雄軍不能進退得還者什三四我師
遂取德清宋知軍尚食使張旦及胡福等死者十四人

按原書敘此事係襲用通鑑長編之文而刪節失當如
於天雄軍圍城惶遽下即云伏發而刪去設伏狄相廟
一節則所云伏者果誰之兵乎
於文義殊為疎舛今並改正 我師遂進抵澶州之北

直衝宋陣圍合三面宋李繼隆等整軍成列出禦統軍
順國王達蘭為牀子弩所傷中額而隕我師乃退 十

一月宋帝勞軍于澶淵是時曹利用之書已通帝乃遣
左飛龍使韓杞持國書偕至澶州杞跪授書函復以闕
南為請宋帝曰所言歸地事極無名若必邀求朕常決
戰耳實念河北居人重有勞擾歲以金帛濟其不足朝

廷之體固亦無傷誓書不必具言但令曹利用與韓杞
口述茲事可也利用一再往返乃許歲遺絹二十萬疋
銀一十萬兩和議遂定帝許以兄禮事宋宋命李繼昌
齋國書與我使右監門衛大將軍姚東之來帝復遣西
上閤門使丁振奉誓書之宋遂退師自是南北俱息兵
矣

宋真宗車駕至澶州將止寇準固請渡河高瓊遂麾
衛士進輦至浮橋瓊執撾擊輦夫背令亟行既至登

北城門樓張黃龍旗諸軍皆呼萬歲聲震數十里初
曹利用議和面請宋帝歲賂金帛之數宋帝曰必不
得已雖百萬亦可寇準召語之曰雖有勅旨汝所許
不得過三十萬過三十萬將斬汝矣利用來議果亦
如數成約而還兩議既定尋即退師

十二月朔日食 是歲宋真宗景德元年

乙巳統和二十三年春二月宋遣孫僅來賀太后生辰

秋八月有星孛於紫微

丙午 統和二十四年秋九月幸南京

按原書此年不載事實今據遼史補

丁未 統和二十五年夏五月朔日食

戊申 統和二十六年夏五月駐蹕懷州 是歲宋真宗大

中祥符元年

己酉 統和二十七年夏四月駐蹕中京

按原書於此上二年大載事實今據

遼史

補

庚戌 統和二十八年夏六月以歲饑遣使如宋告糴宋詔

雄州出粟二萬石賤價賑之 冬十一月帝遣兵伐高

麗高麗與女直合兵來拒我師敗績

辛亥 統和二十九年冬十一月幸顯州

壬子 開泰元年 按原書統和盡三十年次年方改開泰與史錯互不合今改正 春二月駐

蹕瑞鹿原

癸丑 開泰二年以幽州為析津府 冬十二月朔日食

甲寅 開泰三年秋七月如平地松林

乙卯 開泰四年夏六月朔日食

丙辰 開泰五年春正月駐蹕雪林

丁巳 開泰六年春正月如錐子河 是歲宋真宗天禧元

年

戊午 開泰七年夏六月彗星出北斗

己未 開泰八年春三月朔日食

庚申 開泰九年春二月如鴛鴦淶

按原書於統和二十九年開泰元年三年五年

六年九年俱失載事

實今並據遼史補

辛酉 太平元年秋七月朔日食

壬戌 太平二年春二月宋真宗崩太子禎嗣立是為仁宗

是歲宋真宗乾興元年

癸亥 太平三年冬十月駐蹕遼河 是歲宋仁宗天聖元

年

甲子 太平四年冬十月駐蹕遼河

按原書於此上三年失載事實今據遼史補

乙丑 太平五年春正月如混同江

丙寅 太平六年冬十月朔日食

丁卯 太平七年春正月宋遣龍圖閣待制孔道輔來賀帝

燕之有優人以文宣王為戲道輔色怫然徑出主客者

邀道輔還坐且令謝道輔曰宋與北朝通好以禮文相接今俳優之徒侮慢先聖而不之禁北朝之過也帝酌大卮賜之曰方天寒飲此可以致和氣道輔曰不和固無害帝及羣臣皆禮重之道輔孔子四十五代孫也

戊辰 太平八年春三月朔日食 夏四月有星大如斗聲

如雷自北流於西南光燭天下尾長數丈久之散為蒼白雲

已巳 太平九年春三月歲饑流民之宋境上宋仁宗曰皆

吾赤子也可不賑救之詔給以唐鄧州閒田仍令所過

州縣給食 秋八月朔日食

庚午 太平十年秋七月詔來歲行貢舉法

按原書此年失載事實今據遼

史補

辛未 太平十一年先是太后未歸政前帝已長立每事拱

手府庫中需一物必詰其所用賜及文武僚庶者允之
不然不與帝既不預朝政縱心弋獵左右狎邪與帝為
笑謔者太后知之重行杖責帝亦不免詰問御服御馬

皆太后檢校焉或宮嬪讒帝太后信之必庭辱帝帝每承認畧無怨辭好讀唐貞觀政要至太宗明皇實錄則欽伏故御名連明皇諱上一字又親以契丹字譯白居易諷諫集詔臣下讀之嘗云五百年來中國之英主遠則唐太宗次則後唐明宗近則今宋太祖太宗也或諸道貢進珍奇一無所取皆讓於弟親政後方一月太后暴崩帝哀毀骨立哭必嘔血蕃漢羣臣上言山陵已畢宜改元帝曰改元吉禮也居喪行吉乃不孝子也羣臣

曰古之帝王以日易月宜法古制帝曰吾契丹主也寧
違古制不為不孝之人終制三年丞相耶律隆運本漢
人姓韓名德讓太后賜姓耶律改名隆運尋拜大丞相
封晉王景宗崩太后臨朝隆運私事之是時太后年方
三十諸子尚幼外無親援雄傑角立帝登大寶皆隆運
力也帝念其功父事之隆運薨帝為制服其終始眷遇
如此帝性英辨多謀神武冠絕遊獵時曾遇二虎方逸
帝策馬馳之發矢連殪二虎又曾一箭貫三鹿

時幽州
試舉人

以一箭貫三鹿賦題駢

馬劉三振獻射二虎頌

至於道釋二教皆洞其旨律呂

音聲特所精徹承平日久羣方無事縱酒作樂無有虛
日與蕃漢臣下飲會皆連晝夕復盡去巾幘促席造膝
而坐或自歌舞或命后妃已下彈琵琶送酒又喜吟詩
出題詔宰相已下賦詩詩成進御一一讀之優者賜金
帶又御製曲五百餘首幸諸臣私第為會時謂之迎駕
盡歡而罷刑賞信必無有僭差撫柔諸蕃咸有恩信修
睦宋朝人使饋送躬親檢校時黃河暴漲溺會同驛帝

親擇夷坦地復創一驛每年信使入境先取宋朝登科
記驗其等甲高低及第年月其賜賚物則密令人體探
宋真宗上仙薛貽廓報哀入境幽州急遞先聞帝不俟
貽廓至闕集蕃漢大臣舉哀后妃以下皆為沾涕因謂
宰臣呂德懋曰吾與兄皇未結好前征伐各有勝負洎
約兄弟二十餘年兄皇昇遐兄與吾同月生年大兩歲
吾又得幾時也因又泣復曰吾聞姪帝年尚幼必不知
兄皇分義恐為臣下所間與吾違約矣後貽廓至闕達

宋帝意帝喜謂后曰吾觀姪帝來意必不失兄皇之誓

復謂呂德懋曰晉高祖承嗣聖爺爺

嗣聖太宗也
爺爺翁呼也

之力

深矣少主登位便背盟約皆臣下所惑今姪帝必敦篤
悠久矣又謂后曰汝可先貽書於南朝太后備述妯娌

之好人使往來名傳南朝又詔燕京憫忠寺特置真宗

御靈建資福道場百日而罷復詔沿邊州軍不得作樂

後因御宴有教坊都知格守樂名格子眼轉充色長因

取新譜宣讀帝欲更遷一官見本名正犯真宗諱因怒

曰汝充教坊首領豈不知我兄皇諱字遂以筆抹其譜而止燕京僧錄亦犯真宗諱勅更名圓融尋下令國中應内外文武百僚僧道軍人百姓等犯真宗諱者悉令改之又詔漢兒公事皆須體南朝法度行事不得造次舉止其欽重宋朝百餘事皆此類也末年染消渴病多忌諱惡稱說死亡之人雖帝之父母尊號亦不得言之病亟乃驛召東平王蕭孝穆上京留守蕭孝先赴闕始以輔立之事委之次以不得失宋朝之信誓屬之又屬

子宗真曰皇后事我四十年以其無子故命汝為嗣我
死汝子母切毋殺之 夏六月三日崩於上京東北三
百里大斧河之行帳年六十一在位通太后臨朝凡四
十九年葬上京西北二百里赤山上尊諡曰文武大孝
宣皇帝廟號聖宗

按原書誤以聖宗尊號
為諡今據遼史改正

欽定重訂契丹國志卷七